

摘藻堂四庫全書薈要

集部

欽定四庫全書薈要卷一萬三千七百七十四

集部

柳河東集卷三十九

唐柳宗元撰

奏狀二十一首

為廣南鄭相公奏百姓產三男狀

鄭相公即前鄭綱也元和五年出為廣南九年五月史載以前廣南節度使鄭綱為工部尚書則此狀當在元和六七年作

右臣所部貞節坊百姓某妻產三男者臣詳究往例實

謂休徵已量事給絹三十疋充其乳養者伏以陛下勤
卹黎元感通天地靈心昭答景福已興方便億兆繁滋
區夏充牣音切故表祥於字育是啓運於昇平事杳化源
慶延邦本鱗羽之瑞曾何足云臣幸列藩維嘗叨樞近
私賀之至

為薛中丞浙東奏五色雲狀

薛中丞戎也韓文公嘗誌其墓云元和十二年
拜越州刺史兼御史中丞浙東觀察使此狀當
在柳州作然兩地相去遼絕況五色雲事亦
便當敷奏而公自柳州為作奏狀亦可疑云

右臣得管內台州奏月日五色雲見者一州官吏僧道
耆老悉皆瞻覩已奏聞并寫圖奉進者伏以景雲上瑞
王者社符煥彩彰之在天知聖德之昭感伏維陛下化
孚有截道洽無垠承天地之貞明導陰陽之和氣遂使
紛紛郁郁自東而徂西若烟非烟一旬而再至徵諸古
諜音牒事罕前聞伏乞宣付史館以昭簡冊

為裴中丞奏邕管黃家賊事宜狀

公嘗代裴中丞謝討黃賊表在
元和十四年狀當次表後作

右今月四日邕管奏事官嚴訓過稱押衙譚叔向等與黃家賊五千餘人謀為翻動雖已誅斬猶未清寧當時差本道同十將某至邕管界首賓州以來迎探事宜兼為聲援昨得十四日狀并嚴訓狀報同其黃家賊並已退散各歸洞穴訖伏以鼠竊狗偷非足為患陛下威靈遠被神化旁行遂使姦猾之謀先期而自露回邪之黨不戮而盡夷伏恐飛章已達吉語未聞尚軫天心猶煩廟筭臣謬居方鎮忝接疆界所得事宜不敢不奏

讓監察御史狀

公拜監察御史裏行在貞元十九年閏十月諸集皆載且狀首有名銜云承奉郎新除監察御史當云裏行後人妄削之耳

右臣伏准名例律諸官與父祖諱同者不合冒榮居之臣祖名察躬今臣蒙恩授前件官以幼年逮事王父禮律之制所不敢踰臣不勝進退惶恐之至謹詣光順門奉狀以聞伏聽勅旨

勅新除監察御史柳宗元祖名察躬准禮二名不偏

諱不合辭讓年月日檢校司空同中書門下平章事
杜佑宣

為京兆府昭應等九縣訴夏苗旱損狀

貞元十九年自正月不雨至於七月時京兆尹
李實也韓文公嘗上實書云今年以來不雨者
百有餘日未有赤心事上憂國如閣下者此狀
正訴旱而欲蠲輸則實仁人之心亦可槩見矣
然史傳謂關中大歉而實為政猛方務聚斂進
奉以固恩顧百姓所訴一不介意繼以是坐貶
其說互相
背戾如此

右臣謬領京畿已踰兩月政術無取誠懇莫伸遂使雨

澤憊時田苗微損夙夜競懼寢食靡遑今長安一十四縣皆准常年例全徵皆一作並其昭應等九縣臣各得狀並令詳審名絕隱欺謹具別狀封進臣當府夏稅通計約二十九萬石已上據所損矜免祇當三萬石有餘恤人則深減數非廣伏以聖慈弘貸憫念蒸黎臣忝職司不敢不奏無任慙懼之至

為南承嗣請從軍狀

承嗣南霽雲之子七歲為婺州別駕歷刺施涪二州元和元年劉闢叛以無脩自涪謫永集有

送南涪州量移澧州序云始由施州為涪州捍蜀道勦寇敵畏不敢犯然而筆削之吏以簿書校計盈縮受譴茲郡凡二歲當是元和三年赦後自永移澧矣王承宗負恩干紀命將徂征在元和四年十月此狀公至永後作也所謂亡父死節睢陽公嘗有南公睢陽廟碑云

故某官贈某官某乙男某官某乙

右臣亡父至德之歲死節睢陽陛下每降鴻恩必加褒寵臣自七歲即忝班榮垂五十年常居祿秩再守遐郡績用無成終貽官謗甘就嚴譴無以負荷先志報効殊私以慙以懼隕越無地伏見某月日勅以王承宗負恩

干紀命將徂征雷霆所加殄滅在近臣竊不自揆思竭忠誠願預一卒之任以荅百生之幸庶得推鋒觸刃摩壘搴旗冀獲盡於微誠倘不墜於遺烈踊躍之至夙夜不寧敢希皇明俯鑒丹懇臣聞周官考藝國子置車甲

之司

周禮夏官司馬有司甲之職其文闕焉

漢道推恩孤兒脩羽林之用

事詳南府君睢陽廟碑及送南涪州量移澧州序

千秋思奮於事越

漢南粵傳高后時粵

頗為患文景繼立乃委心歸順至武帝時獨其相呂嘉不欲附從武帝使莊參以二千人往參辭不可故濟北相韓千秋奮曰以區區粵又有王應獨呂嘉為害

願得勇士三百人必斬嘉以報於是遣千秋入粵仲孺

期死於奔吳

西漢灌夫字仲孺吳楚反時潁陰侯灌嬰為將軍屬太尉請夫之父孟為校尉夫以

千人與父俱時孟年老潁陰侯強請之鬱鬱不得志故戰常陷堅遂死吳軍中漢法父子俱有死事得與喪歸

夫不肯隨喪歸奮曰願取吳王若將軍頭以報父仇

義激君親名高竹帛臣雖無

似有慕昔人雖身塗草野死而不朽披肝歷血昧死上

陳無任懇迫忠憤之至謹錄奏聞伏候勅旨

進農書狀

貞元五年正月乙卯詔曰四序嘉辰歷代增置
漢崇上巳晉紀重陽或說攘除雖因舊俗與衆
共樂誠洽瀝時朕以春方發生候及仲月勾萌
畢達天地和同俾其昭蘇宜助暢茂自今宜以

二月一日為中和節以代正月晦日脩三令節數內外官司休假一日宰臣李泌遂請中和節日令百官進農書司農種稂之種上從之此狀謂奉某月日勅宜以二月一日為中和節所司進農書永以為常式者當即貞元五年二月作所進農書諸本皆作三卷公時益未第云

右伏奉某月日勅宜以二月一日為中和節所司進農

書永以為恒式者臣伏以平秩東作虞書立制倣載南

畝周雅垂文此皆奉天時以授人盡地力於農食一作而豐

食自陛下惟新令節益厲農功既立典於可傳每陳書

而作則耕鑿之利敷帝力於嘉謨稼穡之難動天心於

睿覽勤勞率下超邁古先凡在率土不勝幸甚前件農
書謹函封進謹奏

代人進甕器狀

公集有元饒州二書在元和八年
饒州當進甕器此必為元作也

右件甕器等

一上有甕器
若干事字

並藝精埏埴制合規模稟至

德之陶蒸自無苦窳合大和以融結克保堅貞且無瓦

釜之鳴

選黃鍾毀棄瓦釜雷鳴
注瓦釜喻庸下之人也

是稱土錮之德

漢司馬遷傳堯

舜堂高三尺茅茨不剪飯土
簋獸土錮音刑以盛羹也

器慙瑚璉

力展切

貢異器丹

若音奴 既尚質而為先亦當無而有用謹遣某官某乙隨

狀封進謹奏

柳州舉監察御史柳漢自代狀

公元和十年三月出為柳州六月二十七日到任此狀在柳州作也赦文在元和六年詳下

中書門下

舉柳漢狀

右伏准從前赦文常叅官上後舉一人自代者伏見前件官頗有才行長於政術久歷嶺南使職臣之所知敢舉自代無任懇迫之至

上戶部狀

元注云左降官員外置同正員俸料舊用戶部省員闕官錢充今請改授正官占闕不用上件

錢每年約計數萬

貫此在柳州作

右伏以左降官是受責之人都不釐務戶部錢是准勅收貯不合別支又所授員外官亦非舊制宗元在永州日見百姓住宅公驗有司戶李邕判給處足明皆是正官今請悉依故事為準並廢員外所置凡在貶黜授以正員責其成功俾無虛授貯錢既免支用加數足應軍

須實冀貸不濫分官無曠職謹狀

柳州上本府狀

元注云莫誠救兄莫蕩以竹刺莫果右臂經十一日身死其莫誠禁在龍城縣准律以佗物毆傷十二日辜辜內死者各依殺人論本府謂桂管也

右奉牒准律文處分者已帖縣准牒待秋分後舉處訖
伏以慈惠化人孝悌成俗屬吏所見皆許申明至公之
下敢竭愚慮竊以莫誠赴急而動事出一時解難為心
豈思他物救兄有急難之戚中臂非必死之瘡不幸致

殂揣非本意按文固當恭守撫事亦可哀矜斷手方迫
於深哀周身不遑於遠慮律宜無赦使司明至當之心
情或未安守吏切惟輕之願況俟期尚遠稟命不遙伏
乞俯賜興哀特從屈法幸全微命以慰遠黎則必闔境
荷慈育之恩豈惟一夫受生成之賜倘以律文難變使
牒已行則伏望此狀便令廢格輕賜塵贖惶戰交深謹
錄狀上奏聽處分

為裴中丞伐黃賊轉牒

次前謝黃少卿賊表作孔大夫即嶺南節度使
孔幾陽中丞即容管經略使陽旻李中丞即安
南都護李
象古也

當管奉詔與諸管齊進誅討邕管草賊黃少卿漢軍馬
步等若干人各具兵馬數及軍將若干前牒奉處分切
以天啓昌期大功畢集神開興運微惡盡除黃少卿等
厯稔逋誅舉宗肆暴恃狡免之穴踰伏偷安憑孽狐之
丘跳踉見怪跳音迢踉音良走也以為威弧不射天網可逃侵逼
使臣隳犯王略恣其毒虐速我誅鋤敵國盡在於舟中

史記吳起謂武侯曰君不還師已期於席上史記蔡澤謂應侯曰

君相秦計不下席謀不出廊廟坐制諸侯利施謂宜投

四海此謂當時席上之謀蓋可以約還師之期也

戈頓顙面縛乞身歸郡邑於王宮效黎獻於天吏而乃

繕兵補卒增壘閑途閑一作閑正當天討之辰書天討有罪五刑五用哉更

積鬼誅之罪莊子為不善乎幽闇之中者鬼得而誅之衆輕鬪蟻晉殷仲堪父

床下蟻動謂之牛鬪勇劣怒蛙韓非子云越王伐吳欲人之輕死也

此王曰為其有氣故也纖縞當強弩之初史強弩之末力不能以入魯縞孤豚儂肥

牛之下左傳昭公十三年牛雖瘠儂於豚上事同拾芥力易摧枯杪忽蜂腰

虛見辱於齊斧

齊側皆切

突梯鼠首濫欲寄於旄頭勦絕有

時不索何獲某拱稽致命執銳忘生車甲既備於小戎

詩小戎美襄公也備其車甲以討西戎

鯨鯢豈逃於誅戮

左傳宣公十二年武非吾功也

古者明王伐不敬取其鯨鯢而封之以為大戮於是乎有京觀以懲淫慝

竊觀上畧總帥中

權戰士義激於身心列校勢成於臂指蹶張之技盡出

於山林

漢申屠嘉傳申屠嘉以材官蹶張從高祖擊項籍如淳曰材官之多力能腳踏强弩張之故曰

蹶拔距之材徧徵於川洞

漢甘延壽傳投石拔距絕於等倫顏師古曰拔距者有人

連坐相把據地距以為堅而能拔取之皆言其有手掣之力

賞懸香餌令布疾雷莫

不鼓舞戎行虔恭師律投軀不憊於羽檄

漢高祖曰吾以羽檄徵天

下兵未有至者注檄木長尺二寸用徵召急則挿以鳥羽示急也

跂足唯俟於牙璋

周官典瑞

掌牙璋以起軍旅以治兵守注云牙璋琢以為牙牙齒兵象故以牙璋發兵也

今月某日奏事

官米蘭迴捧受詔命神飛首勇足蹈心馳懽聲洽於萬

夫勝氣橫於千里國容不入屨且及於寢門

漢胡建傳制曰國容

不入軍軍容不入國左傳宣公十四年楚子使申舟聘于齊無假道于宋及宋宋人止之華元曰過我而不假道鄙我也鄙我亡也殺其使者必伐我伐我亦亡也亡一也乃殺之楚子聞之投袂而起屨及于室皇劔及于寢門之外車及於蒲胥之

家事勿開土已填於左闔

國語

吳語越王勾踐將伐吳乃入命夫人王背屏而立夫人
向屏王曰自今日以後內政無出外政無入內有辱是
子也外有辱是我也吾見子於此止矣王遂出夫人送
王不出屏乃闔左闔填之以土去筭側席而坐不掃其
命大夫即
亦然即以月日全軍出次分道並進所期勦力敢告

同心孔大夫貞直冠時清明格物全體許國一心在公

兵精食浮為日固久容府陽中丞以義烈為已任勲襲

太常安南李中丞以英武為家風業傳彛器並膺邦寄

克達皇威南則浮海濟師共集堂堂之陣

孫子勿擊堂堂之陣東

則橫海誓衆用成善善之功

詩緇衣以明有國善善之功焉

以此鼓行

坐觀盡敵刑惟勿喜誅有可哀徵側之勇冠一方竟就

伏波之戮

馬援傳交趾女子徵側及女弟徵貳反於是璽書拜援伏波將軍南擊之軍至浪泊上與

賊戰遂大破援追徵側等斬其首傳洛陽

呂嘉之威行五嶺終摧下瀨之師

呂嘉南粵相也武帝時粵王願欲內附獨呂嘉建德反朝廷於是命路博德為伏波將軍楊僕為樓船將軍及歸義粵侯二人為下瀨將軍共討之嘉遂與其屬數百人亡入海尋復追降之南粵乃平事見南粵傳

嗟

此陋微自貽擒滅勉成良畫速致殊勲雖荒徼之地固

不勞於有征而昇平之年將自此而何事書之竹帛實

謂揚名雖須移牒隣管以成掎角

左傳譬如捕鹿晉人角之諸戎掎之與晉

陪之舉牒者

賀中書門下誅淄青逆賊李師道狀

元和十四年次前柳
州賀破東平表作

右今月三日得知進奏官某報前件賊以前月九日克
就梟戮者伏以天啓聖期神資良弼必有懲討以致昇
平蠢爾兇渠敢行悖亂締交於雷霆之下效逆於化育
之辰逞豺聲以欺天恣狼心而犯上嘉謀克叶威命旁
行破竹寧比其發機走丸未喻於乘勝

杜預云用兵如
破竹數節之後

迎刃而解孫子濁河清濟曾無溝洫之虞大峴琅邪不

序如丸之走盤

峴胡典切河濟大峴琅邪皆淄青間山水名也

天兵四合賊衆屢

摧然後赦劫脅之辜許其歸復寬註誤之典期以撫循

註音

外怛皇威中感聖德雖在梟鏡豈不知歸

郊祀志古者天

子祠黃帝用一梟破鏡孟康曰梟鳥名食母破鏡獸名食父黃帝欲絕其類使百吏祠皆用之方士虛誕云以歲始祓除凶灾令神仙之帝食惡逆之物使為逆者竟無有遺育也梟堅堯切

是以未極誅鋤

遽聞內潰鯨鯢已戮見東海之無波氛沴盡銷仰太陽

之普照功格於天地化合於陰陽一德方繼於商書

書咸

有一德克
享天心

降神自同於周雅

詩維岳降神
生甫及申

遂使垂白遺

老再逢大寶之安措紳諸生遠期貞觀之理基特承朝
獎謬列藩臣常以突刃觸鋒未為効節膏原潤草豈足
酬恩寤寐撫心不遑寧處今則削平之際慙無尺寸之
功開泰方初徒受丘山之寵無任憤激屏營之至忭舞
歡慶倍百恒情

賀中書門下平淄青後肆赦表

元和十四年次前
賀克東平散表作

右伏奉二月日德音以淄青削平慶賜大洽率土之內

扑躍無窮伏以周滅三監但明誅放之罰

事詳見書

漢平七

國更嚴斬殺之科

景帝紀七國舉兵皆反乃大赦天下遣太尉周亞夫將軍竇嬰將兵擊破

之斬首十餘萬級追斬吳王濞於丹徒膠西王等皆自

殺夏六月詔曰迺者吳王濞等為逆起兵相脅誣誤吏

民今濞等已滅吏民當坐濞等及逋逃亡軍者皆赦之

楚元王子藝等與濞等為逆朕不忍加法除其籍毋令

汚宗

室未有剪覆兇渠撫存疑類威暫行而德洽誅纔及

而恩加操兵者悉獲歸休秉耒耜者更聞優復與之種食

豐以貨財疾苦盡除鰥孤咸育葬戰死之骨增以賞延

憐刃傷之肌存其廩給滌山川之舊汚申節義之餘寬

功多受三事之榮

詩三事大夫莫肯夙夜注云三事謂三公也

節著有十連

之寵

禮記十國以爲連連有帥

較然逆順益以彰明和氣遠周罷七

旬之干羽

書舜舞干羽於兩堦七旬有苗格

仁風溥暢收六月之車徒

詩六月宣王北伐也

寰海永康夷夏均慶某忝司戎旅獲奉昇平

當伊尹無恥之辰

書伊尹曰予弗克俾厥后爲堯舜其心愧恥若撻於市

見咎繇

惟輕之德

書罪疑惟輕

抃躍之至倍萬恒情無任慶賀之至

賀中書門下分淄青諸州為三道節度狀

元和十四年次前代裴中丞
賀分淄青為三道節度表作

右某伏見某月日制分淄青諸州為三道節度都團練

觀察等使者害氣盡除和風遠溥

一作溥暢

裂壤既分其形

勝經野必正其提封河濟異宜海岱殊服八命作牧無
聞威福之源十國為連已肅澄清之政鼠無夜動鴉變

好音惠澤豈俟於崇朝仁化寧期於必代遂使琅邪即

墨田生無慮其異謀

史記齊湣王時田單為臨淄市掾會燕使樂毅伐破齊湣王出奔已

而保莒城燕師長駢平齊而田單走安平燕軍尋復攻
安平城壞單遂東保即墨時燕既盡降齊城獨莒即墨

不下俄燕昭王卒惠王與樂毅有隙單乃縱反間於燕
數出詭計而燕果陷其術中單乃縱火牛且進軍擊之
燕軍大敗所過城邑皆畔燕而
歸單齊故七十餘城皆歸舊
聊攝姑尤晏子但聞其

善祝

晏子嬰也事齊景公會公病期月不瘳諸侯之賓
問疾者多在時梁丘據與裔欸言於公曰吾事鬼

神豐於先君有加矣今君疾病為諸侯憂是祝史之罪
也盍誅之以辭賓晏子曰聊攝以東姑尤以西其為人
也多矣雖其善祝豈能勝億兆之詛君若誅於祝史脩
德而後可聊攝齊西界也平原聊城縣東北有攝城姑
尤齊東界也姑水尤水
皆在城陽郡東南入海
恭以相公謇參禹績制出蕭規

光輔聖神永康黎獻某獲逢開泰忝守方隅抃躍之誠

倍百恒品

為裴中丞上裴相賀破東平狀

次柳州賀破東平
表作裴相公度也

右伏以逆賊李師道克就梟擒已具中書門下狀賀訖
某忝居末屬特受深恩踊躍不寧輒復披露竊以自古
中興之主必有命代之臣一德同功以叶休運故申甫
方邵成宣王復古之勲

謂申伯尹吉甫
方叔召伯也

吳鄧寇耿致光

武配天之業

謂吳漢鄧禹
寇恂耿弇也

此皆上下齊志中外悉心雖

成功則多而陳力甚易豈若閣下挺拔英氣邁越常流

獨契聖謨以昌鴻業廟略初定異議紛然詆訕盈朝萋

斐成市

萋音妻盛兒斐妃尾切分別文也

閣下秉心不惑定命彌堅討

淮右之兇則下車而授首服恒陽之虜則馳使而草心

淮右謂度討吳元濟度既平蔡乃遣華州刺史鄭權為橫海節度使統德隸滄景等州而王承宗不敢為亂也

況師道惡稔禍盈鬼怨神怒恣行悖慢敢肆欺誣天兵

四臨所至皆捷次又捨其將校許以歸還罪止一夫恩

加百姓豺狼感化梟鏡懷仁自致誅夷以成開泰萬方

有慶四海無虞遂令率土之人盡識太平之理盛德大

業振古莫儔然則布政明堂勒功東嶽光垂後祀輝映
前王神化允屬於聖君崇勲實歸於宗袞慶賀之至倍
萬恒情

為裴中丞上裴相乞討黃賊狀

次前謝討黃
少卿賊表作

某材質無堪授任非次當有事之日忠懇莫施遇成功
之辰慙憤空積陳力之志誓死不渝伏惟仁恩終賜展
効今者中華寧謐異類服從唯此南方尚餘寇孽伏以

黃少卿等憑培塿以自固

培薄口切塿朗口切小冢也又小阜也

合莖脆

以為強

莖寸卧切脆此芮切易斷也

却脅使臣侵暴列郡雖狐鼠之

陋無足示威而蜂蠆之微猶能害物必資翦伐方致和

平庶盡駑蹇之勞以荅恩榮之重撫心踊躍夙夜不寧

私布丹誠敢期明鑒無任感激屏營之至

為桂州崔中丞上中書門下乞朝覲狀

次前卷請朝覲表

作中丞崔泳也

右某幸遇文明叨承委寄理戎典郡十有四年瞻戀闕

庭神魂飛越頃在邕州累陳誠懇謬施進律之寵

禮記有功

德於民者未遂執珪之願

左傳朝聘有圭周官大宗伯加地進律之職曰公執桓圭侯執信圭

伯執躬圭

相公膺賢輔聖大叙彝倫中外之臣出入更踐某

自領桂管又逾再周企鸞鷺於紫霄獨無羽翼仰星辰

於黃道徒竭丹誠

渾天圖天有黃赤二道禮記注疏日月四時遊於黃道其方不同

況

正月會朝遠夷皆至

周官春見曰朝

六歲來見要服有期

書六年五

服一朝國語要服者貢注云要服六歲一見

豈使班超之望長懸

東漢班超傳超以久

在絕域年老思土十二年上疏曰臣聞太公封齊五世
葬周孤死首丘代馬依風夫周齊同在中土千里之間

況於遠處絕域小臣能無
首丘依風之思哉云云

子牟之戀空積

莊子魏公子牟身居江湖

之上心馳乎魏闕之間

伏乞特申微願錄受冗員徵故事而不遺

揆夙志而斯畢入天子之國願附禮於小侯拜丞相之

車敢希榮於下客

一更有無任懇禱屏營之至輕瀆威重戰汗伏深謹狀

為南承嗣上中書門下乞兩河効用狀

次前請從軍狀作

右伏以越敗夫差多會稽納官之子

事詳南府君睢陽廟碑及送南涪州

量移澧州序

趙摧粟腹即長平死事之孤

史記趙奢傳趙成王時秦與趙兵相

距長平時奢已死趙以其子括代之已而軍敗數十萬之衆遂降秦秦悉阬之燕用栗腹之謀曰趙壯者盡於長平其孤未壯舉兵擊趙趙使廉頗將大破燕軍於鄣殺栗腹遂圍燕燕割五城請和乃聽之何者義

列之餘色氣猛厲上將効於國用下欲濟其家聲所以憤激悽愴常思致命者也某先父死難睢陽事存簡冊累降優詔榮及子孫爰自緼綬超昇品秩肉食廩給未嘗暫停頃守涪州屬西蜀邁逆將致死命以盡夙心寢戈嘗膽志願未究會刀筆之吏寘以深文首級之差今復誰辯薏苡之謗不能自明

馬援傳援初在交趾常餌薏苡欲以為種軍還載之

車中時人以為南土珍怪權貴皆望之援時方有寵故
莫以聞及卒有上書諧之者以為前所載還皆明珠文
犀帝怒援妻孥懼不敢以喪還舊塋葬猶賴舊勲謫居樂土食人力之粟

守無事之官拳拳血誠無所陳露伏見明制興師討伐
恒冀蔑爾小醜尚欲逋誅某才非古人志慕前列願得
身當一隊効死戎行竭平生之忠懇申幽明之冤痛撫
劒心往發言涕零嘗聞漢法有奮擊匈奴者諸侯不得
擁遏又況丞相總軍國之重定廊廟之謀固當弘獎無
所弃捐伏乞哀憫收撫以成其心無任懇迫惶恐之至

柳州上中書門下舉柳漢自代狀

次前柳州舉監察御史柳漢自代表作

右伏准元和六年十月十七日勅常參官授上後三日
內舉一人以自代便具所舉人兼狀上中書門下者今
奏請前件官自代謹連狀

為長安等縣耆壽詣相府乞奏復尊號狀

已具三十七卷為京
北府請復尊號表注

右某等
一上更有長安縣耆
壽某乙若干人字
伏以生長明時游泳皇澤

鼓腹且知於帝力食毛敢忘於君恩竊見近者祥瑞所
呈周於百郡豐稔之報均於四方有以知上玄降靈誕
告嘉應彰我君文明之化仁育之恩大道既行鴻名未
舉是以殷勤昭著如斯而不已者也某皆陶煦純仁成
此耆老

煦火羽切
烝也

生既無補死而何求唯願上聞帝閣復

建尊號用彰聖德以報皇慈披露血誠伏守天闕糜軀

碎骨猶生之年謹以今日詣光順門輒進奏訖

奏一作表伏

惟相公贊翊明主共致太平而使名號尚鬱天人失望

草野愚鄙竊有感焉伏望敷奏之際開陳其要俾下情
允達大願克從退就泉壤樂而無恨輕黷國相伏待典
刑謹狀

為京畿父老上府尹乞奏復尊號狀

狀謂今請詣光順門進
表當在前狀之前作

右某等幸以羸老獲覩昇平蹈舞薰風謳歌壽域譬之
草木何以報天寤寐焦勞不知所措伏見聖君臨御玄
化升聞瑞應匝於萬方

匝作谷切
與市同

豐報窮於四海神祇

注意天地傾心覺悟生人必有為者蓋以挹損徽號近
二十年盛德益光大名未復致遠邇積慮幽明憤懷故
自古以來嘉瑞之至未有如今歲之盛也斯乃上玄深
旨下人懇誠勤勤相符正在於此某等眷戀明時朝夕
是切唯願早復大號以契天心庶得聖政益光鴻化彌
遠少遂踴躍之甚今請詣光順門進表昧死上陳伏以
侍郎道合君臣惠敷黎庶倘遂收採愚慮致貢大庭俾
草萊微誠得達萬乘非所敢望惶懼伏深謹狀



柳河東集卷三十九



總校官候補中書臣吳紹潔

校對官編修臣裴謙

謄錄貢生臣孟啟疆

謄錄監生臣范相

欽定四庫全書薈要

集部

柳河東集卷四十一

詳校官助教臣常循



欽定四庫全書薈要卷一萬三千七百七十五

集部

柳河東集卷四十

唐 柳宗元 撰

祭文哭辭一十五首

祭楊憑詹事文

元和十二年柳州作公集有亡妻弘農楊氏墓誌云貞元十五年卒此文謂某以通家承德風奉良姻莫成子姓早喪淑人迨今挈然十有八祀蓋自貞元十五年己卯至元和十二年丁酉為十八年也據憑傳元和四年為京兆尹以御史中丞李夷簡素與憑有隙乃劾奏其贓罪及

不法事天子以憑自尹京兆人頗懷之遂詔出
守賀州臨賀尉公謂京兆之難下多怨怒顛沛

三載益

謂此耳

年月子壻謹以清酌庶羞之奠昭祭於丈人之靈卿雲

輪囷天漢昭回

西京雜記慶雲或曰卿雲詩倬彼雲漢為章于天

自然物外寧

雜塵埃公稟間氣

間居

心靈洞開翱翔自得誰屑羣猜

孝友忠信聞於九垓摘華發藻

摘抽知切又音離說文張也

其動如

雷世榮甲科亦務顯處公之俊德有而不顧御史之選

朝之所注公勤於養投劾引去時任方隅威刑是務公

施其惠亦莫有選

五故切與迂同

京兆之難下多怨怒或由以

黜瓦石盈路公捍其強仁及童孺左遷而出擁道牽慕

道峻多謗德優見憎煩言既詆倚法斯繩南過九疑東

逾秣陵顛沛三載天書乃徵入傳王國嘉聲聿興詹事

東宮致政是膺年唯始至道則彌勵頡頏今古

頡奚結切頡音

杭又音岡飛而上曰頡飛而下曰頡

優游德藝實期濬發再光文陛誰謂

昊天遽茲降厲嗚呼哀哉某以通家承德夙奉良姻莫

成子姓早喪淑人恩禮斯重眷撫惟新綢繆其志實敬

實勤迨今挈然十有八祀家缺主婦身遷萬里謗言未
明黜伏逾紀德輝間絕音塵莫俟歲首發函視遠如邇
雖當沉痾心術猶治撫膺頓首流泣瞪視澄澄應切既
歛而還莫傳音旨嚮風長慟於茲已矣嗚呼哀哉承訃
之始卜兆既逾載馳斯文出拜路隅哀從海澨視喬切禮
致皇都寸誠相續終歲不渝天道悠遠人世多虞寄心
雙表長恨囚拘嗚呼哀哉

祭穆質給事文

一作祭穆撫州文據傳質舉賢良方正累擢至給事中元和四年坐與楊憑善出為開州刺史卒然此文謂黜刺南方義言盈口又云王命南下郡符東剖留滯湮淪殲此遐壽必是自開移撫未行而卒也公謂欲朔海風以窮洛涘文蓋柳州作豈質元和十二年間方自開遷撫故耶所謂公之伯仲信為先執蓋穆贊穆質穆貲穆賞皆見於先友碑陰記云

昭祭於給事五丈之靈自古直道鮮不顛危禍之重輕則繫盛衰矯矯明靈克丁聖時形軀獲宥三黜無虧賢良發策始振其儀天子動容敬我直辭載之冊府命以諫司抗姦替否與正為期奏書百上知無不為誰謂劉

賈英風莫追給事黃門奉職樞機封還付外動獲其宜
無曠爾位惟公在斯達道之行實惟交友患難相死其
廢自久公實毅然誓均悔咎挺身立氣不改其守黜刺

南荒義言盈口封章致命志期殞首邈矣高標誰嗣於

後王命南下郡符東剖留滯湮淪殲此遐壽嗚呼哀哉

公之伯仲信為先執感激之風道同義立中司守直奸

權是襲致之徽纆

音墨索也易
係用徽纆

誣以賄入瑣瑣其徒榜

訊愈急

榜音彭咎擊也瑣瑣其徒謂楊
瑗胡珣韋顗用意推鞠之

詔下三司議於

洛邑噫我先君邦憲是輯平反羣枉大忤三揖危法旋

加譖言俄及左宦夔國義夫掩泣邪臣既黜乃進其級

端於庶寮直聲允集虔虔小子夙奉遺則公在郎位再

罹擯抑

擯必刃切斥也

時忝憲司竊分枉直抗辭犯長有志無

力惟韓洎劉同憤霑臆

謂韓泰劉禹錫也

道之不行銜媿罔極

公在左掖議登秋官先定於志將發其難決白無狀以

申禍端秉心撰詞義不可干會逢友累曾莫自安感於

褚中有涕洟瀾

褚展呂切絮裝衣也

嗚呼哀哉壽宮久翳狼荒萬

里禮不可違誠不可弭抽哀洩憤舒文致美願溯海風
以窮洛涘清明如在神鑒何已嗚呼格思以慰勤止

祭呂衡州溫文

作之年月具本篇溫之生平公嘗為衡州刺史
東平呂君誄極所稱道蓋不獨於此文見之也

維元和六年歲次辛卯九月癸巳朔某日友人守永州
司馬員外置同正員柳宗元謹遣書吏同曹家人襄兒
奉清酌庶羞之奠敬祭於呂八兄化光之靈嗚呼天乎
君子何厲天實仇之生人何罪天實讎之聰明正直行

為君子天則必速其死道德仁義志存生人天則必天
其身吾固知蒼蒼之無信莫莫之無神今於化先之歿
怨逾深而毒逾甚故復呼天以云云天乎痛哉堯舜之
道至大以簡仲尼之文至幽以默千載紛爭或失或得
倬乎吾兄獨取其直貫於化始與道咸極推而下之法
度不忒旁而肆之中和允塞道大藝脩斯為全德而官
止刺一州年不逾四十佐王之志沒而不立豈非脩正
直以召灾好仁義以速咎者耶宗元幼雖好學晚未聞

道洎乎獲友君子乃知適於中庸削去邪雜顯陳直正而為道不謬兄實使然嗚呼積乎中不必施於外裕乎古不必諧於今二事相期從古至少至於化光最為太甚理行第一尚非所長文章過人略而不有夙志所蓄巍然可知貪愚皆貴險狠皆老則化光之天厄反不榮歟所慟者志不得行功不得施蚩蚩之民不被化光之德庸庸之俗不知化光之心斯言一出內若焚裂海內甚廣知音幾人自友朋彫喪志業殆絕唯望化光神其

宏畧震耀昌大興行於時使斯人知我所立今復往矣
吾道息矣雖其存者志亦死矣臨江大哭萬事已矣窮
天之英貫古之識一朝去此終復何適嗚呼化光今復
何為乎止乎行乎昧乎明乎豈蕩而為大空與化無窮
乎將結而為光耀以助臨照乎豈為雨為露以澤下土
乎將為雷為霆以泄怨怒乎豈為鳳為麟為景星為卿
雲以寓其神乎將為金為錫為主為壁以栖其魄乎豈
復為賢人以續其志乎將奮為明神以遂其義乎不然

是昭昭者其得已乎其不得已乎抑有知乎其無知乎
彼且有知其可使吾知之乎幽明茫然一慟腸絕嗚呼
化光庶或聽之

祭李中丞文

中丞名字未詳文謂始終七載不忘祇勤當是
貞元十四年已拜御史中丞也作之年月具本
篇

維貞元二十年歲次甲申五月某朔二十二日故吏儒
林郎守侍御史王播將仕郎守殿中侍御史穆贇奉議

郎行殿中侍御史馮邈承奉郎守監察御史韓泰宣德
郎行監察御史范傳正文林郎守監察御史劉禹錫承
務郎監察御史裏行柳宗元承務郎監察御史裏行李
程等謹以清酌之奠敬祭於故中丞贈刑部侍郎李公
之靈惟公堅貞守道潔廉成德當官秉彝卓爾孤直高
節外峻純誠內植臨事不回執心無惑矯矯勁節擢於
天枝式是邦族粲其羽儀發跡內史參其軍事自下廟
上直詞屢至於後受邑歷撫疲人公去逾久人滋咏呻

復從京邑辟署司錄振其綱條端我甸服黠吏屏氣貪

官室慾赫赫有命登於王庭邦賦以修國用是經實抗

其長以奉准程校其簿書無失奇贏

奇音羈與畸同說文殘田也羸音盈

說文有餘賈利也

進為正郎勾會是專

會古外切總合也

乃刺於商虎

節登山化壻為沃

周官小行人建天子之六節山國用虎節壻音籍薄土也

致夷於

艱道途謳歌有詔徵還丞我御史執其憲矩糾逖之志

逖音迪

直清是舉慎擇寮吏必薪之楚終始七載不忘祇

勤事無觀瞻道有屈伸阜囊密啓

見上屢阜其囊注

忠懇屢陳

令望逾重名卿是屬拖紳遽聞

拖徒我切論語疾君視之東首加朝服拖紳

卷衣已復

復招魂復魄也朝服大夫以玄纁世婦以禮衣士爵弁士妻以稅衣皆升自東榮中屋履

危北而三號

禮備贈賵恩加命服窀穸有時

窀穸倫切窀音

卷衣投于前

夕歲月逾盛播等猥備官屬況當薦延承其規模奉以

周旋近或逾月遠則累年咸承至公官守獲全故事盡

在遺風藹然俯仰庭際顧慕潺湲

潺湲鉏山切湲胡鰥切

致誠一觴

拜訣堂筵嗚呼哀哉

為韋京兆祭杜河中文

杜河中確也德宗貞元十四年九月以太常卿為同州刺史十五年十二月自同州為河中尹河中絳州節度使十八年三月以河中尹行軍司馬鄭元代之夏卿之為京兆尹在十七年十二月而十九年三月李實已為京兆則杜公之死當在十八年矣文是時作

維年月日甲子京兆尹韋夏卿謹以清酌之奠敬祭於

故河中節度贈禮部尚書杜公之靈自古謀帥恒在諸

儒晉登郗縠亦以詩書

左傳僖公二十七年晉作三軍謀元帥趙衰曰郗縠可臣亟聞

其言矣說禮樂而敦詩書

爰及近代二柄殊途授鉞之臣率由武夫

時惟明靈道冠學徒天子有命摠其戎車何以邦之維

絳及蒲有山有河殿此大都焜燿昌時

焜音混
燿音耀

振宣後

學命服之盛光於列岳謂保豐福永縻王爵壽如何期
神不可度嗚呼哀哉大厯之歲詔徵茂才時忝同道一作

利俱起草萊懷策既陳綸言煥開考第居甲自天昭回

分命邦畿步武獲陪同志為友星霜屢迴長我十年禮

宜兄事周遊歡洽莫不如志於後多幸謬列周行又同

制書並命文昌及余稍遷吏部為郎公屬中兵此焉分

行再獲聯事東西相望

音忘

出處同道樂惟其常後余出

刺九載南服公自左輔遂膺推轂我勤魏闕爰總九流

誰謂河廣願言莫由烹魚之問往復相壽音酬惠好斯厚

惟以綢繆綢音由切繆莫彪切余弟宗卿獲庇仁宇命佐廉問忘

其愚魯假以羽翼俾之騫翥翥章恕切飛舉也惠文戡戡惠文冠也

漢張敞傳秦時獄法吏冠柱後惠文赤紱在股榮映斯極從容何補承慶

唯深報恩無所嗚呼哀哉天子震悼哀我良臣密印追

贈尚書禮殷四方興嗟況此故人循念平昔徘徊悲辛

卜塋斯及禮儀畢陳敬薦行潦洩哀茲辰嗚呼哀哉

為韋京兆祭太常崔少卿文

崔少卿考之史傳未詳惟撫諸表系有崔隱甫之孫溉者一人為太常少卿當即此也文謂夙歲同道從容洛師又云洛中十人談者榮之惟鄭洎齊各登鼎司據夏卿傳始在東都傾心辟士頗得才彥其後多至卿相世謂之知人其以此耶貞元十八年作

維年月日甲子京兆尹韋夏卿謹以清酌庶羞之奠敬祭於亡友故太常少卿崔公之靈惟靈率是良志蹈其吉德炳蔚文彩周流學殖孔氏之訓專其傳釋黃老之言探乎幽蹟六書奧秘是究是索叩爾玄關保其直宅

藝成行備披雲騁跡康莊未窮

康莊道路也說文五達謂之康六達謂之莊

濛汜已極

楚辭天問出自湯谷次于濛汜注云汜水涯也言日出東方湯谷之中暮入西極濛水之

也嗚呼哀哉夙歲同道從容洛師接袂交襟以遨以嬉

策駕嵩少

嵩山少室山在河南府登封縣

沂舟灋伊

灋水伊水在河南府河南縣皆本洛

也州笑咏周星其樂熙熙丹霄可望青雲可期洛中十友

談者榮之惟鄭洎齊各登鼎司或喪或存山川是遠繫

我夫子宜相清時命之不遐孰不悽悲嗚呼哀哉往佐

居守及爾同寮笑遨交歡匪夕則朝入同其室出聯其

鑣

悲嬌切說
文馬銜也

投文報章既歌且謠及我為郎優游吏部

公為御史持憲天路文陛徐趨眷戀相顧歡愛之分有

加於素自我於邁歷刺東吳離憂十年復會名都余為

侍郎銓總攸居實得茂彥奉其規模聯事合情又倍其

初我尹京兆公亞奉常步武相望佩玉以鏘謂保愉樂

長此翱翔抱疾幾何忽焉其亡嗚呼痛哉原念往昔愛

均骨肉我有書笥盈君尺牘寤言在耳古今何速失涕

興哀匍匐往哭撫筵一呼心焉摧剥

普木切

日月逾邁佳

城遽卜素車千里逶迤山谷

逶迤於危切迤音移委曲也

晦爾精靈藏

之斧屋

禮記孔子之喪有自燕來觀者子夏曰聖人之葬人與人之葬聖人也子何觀焉昔者夫子言之曰吾見封之若堂者矣見若坊者矣見若覆夏屋者矣見若斧者矣注云覆謂茨瓦也夏屋今之門廡也其

形旁廣而卑斧形旁殺刃上而長

嗚呼哀哉丹旌即路祖奠在庭去此

昭昭就爾冥冥敬陳澍酌

詩澍酌彼行潦注云澍遠也遠酌行潦之水

以告

明靈臨觴永慟庶寫哀誠嗚呼哀哉伏惟尚饗

為李京兆祭楊凝郎中文

李京兆實也貞元十九年四月公時為藍田尉文謂公之元兄復惠德音益凝之兄憑耳公嘗

為凝墓碣
所載甚詳

維貞元十九年歲次癸未四月辛未朔某日檢校工部
尚書京兆尹司農卿李實謹以清酌庶羞之奠敬祭於
故兵部郎中楊公之靈惟靈清標霜潔馨德蘭薰沖和
茂著孝友彰聞濬發洪緒激揚清芬思侔德祖學紹子
雲瑩彼靈府彬其英文吐論冠時舒華軼羣百氏之奧
一言可分旁貫釋老豈伊典墳謂躡公相躡尼贊揚聖
君高山安仰逝水沄沄嗚呼哀哉惟是伯仲並為士則

連擢首科迭居顯職公之懿美發自朋僚播於四方令
問克昭炯然獨識卓爾孤標翼翼其容羽儀清朝載筆
東掖勲無不紀起草南宮時論增美大梁有艱天子是
使密勿之謀唯道是履復歸一云歸服郎署職茲中兵簡稽

無撓以考其成英風未攄沉疴遽嬰孰云積善降以促
齡昔歲江表獲同宴語謬為好仁不我遐阻公之元兄
復惠德音優游多暇眷盼逾深情言盈耳尺素相尋冀
茲競爽焜燿儒林及此凋落祗摧我心嗚呼哀哉遣車

就引

遣詰戰切見戶部郎中魏府君墓誌銘注

哀挽先路迅風淒悲顏景幽

暮傾都殄瘁揮涕相顧矧茲故人誰任痛慕潢汙一觴
詎寫平素尚饗

為安南楊侍御祭張都護文

楊侍御未詳其名或即楊憑之弟凌然唐史雖
謂凌終於侍御史而先友記云凌以大理評事
卒則與史所載異矣豈憑別一從父弟為侍御
史故史云凌耶張都護公嘗為之誌所載與此
皆合今悉
隨文附之

維年月日故吏某職官某敬祭於故都護御史中丞張

公之靈交州之大南極天際禹績無施強秦莫制或賓

或叛越自漢世聖唐宣風初鮮寧歲稍臣卉服漸化椎

髻卒為華人流我愷悌士燮之理惟公克繼

士燮晉范
文子也此

謂安南都護
府治交趾云

勤勞遠圖敷贊嘉惠銅柱南表前功載修

謂公復銅柱為正
制也事詳見誌注

空道北出式遏蠻貊梯航連連旌旆

悠悠輻湊都會

輻音福湊千候
切說文會也

皇威以流方荷天寵宜

公宜侯聲馳帝鄉魄降炎州嗚呼哀哉公昔試吏時推

清能

謂公為蘄州蘄
春主簿時也

公昔乘輅人知準繩鰥嫠以安征

賦用登

謂公以左領軍衛兵曹為安南經略巡管也

柱史稍遷郎曹繼昇

謂公

檢校尚書禮部員外郎也

程功佐理海裔斯澄

謂公為安南副都護也

乃紀南

方專任是憑

謂公遷檢校太子右庶子兼安南都護兼御史中丞充本管經畧招討處置等使也

禮分五玉

書修五禮五玉注云修吉凶賓軍嘉之禮五等諸侯執其玉

恩錫百朋

詩錫

我百朋箋云古者貨貝五貝為朋百朋言得祿之多也

開府辟掾羣英攸屬顧茲

陋微敢廁甄錄既受筐篚載加命服賜有楚冠用慙豸

角

應劭漢官儀曰解豸獸主觸不直故執憲者以其角形為冠豸大蟹切

星言赴命注望

帷幄視險如夷瞻程非邈伯氏左官爰滯中途流連隱

憂言念涕濡子姓莫在使命頓殊

命一作令

競魂弔影敢廢

斯須情留江徼

音叫

夢結天隅恩切有裕義乖從役顧慕

長慟展轉增惕脅力猶在中腸屢激方俟銷憂永期投

跡謙德不福法星降灾庭懸遽徹

禮記大夫無故不徹懸注云懸樂器鐘磬

之屬正義曰無灾變則不去樂也

駟訃爰來

駟音已

撫躬益恨循顧增哀

瞻容莫及報德何階轎車北轅

轎音茜喪車也

申奠克諧望拜

徒至音塵永乖南州斗酒底寫幽懷

祭萬年裴令文

萬年令裴瑾也公嘗為瑾墓碣云元和十二年七月卒文必是時作又云後夫人柳氏即此所謂追惟淑德嬪於君室者也

惟靈孝友之性實惟天與飾以儒書洽其譽處枵然其

量

枵虛嬌切
虛大兒

廓爾其宇人以義來我以身許蹇裳赴急

不避寒暑交半域中多容鮮拒賢於博奕媚茲讌語或

泛或沉兩得其所考禮成文墜章克舉

謂公撰二
陵集禮也

展樂

承職音官式序既聯奏復亦圖筍簾播在奉常永傳儀

矩

謂公為太常主簿集樂
事作坐立二部伎圖也

脫畧細謹傲忽煩言坦然自

居無顧仇怨卒成官謗莫究禍源坐黜中徙再期騰騫

孰云蓄憤遽此歸魂

謂公為萬年令為金川猾吏所誣奏再謫道循二州佐掾會赦量移

吉州長史而卒也

嗚呼哀哉世稱姻黨鮮克終吉唯我與君久

而逾密追惟淑德嬪於君室上順尊卑下歡儔匹致其

孝敬式是仁恤爰及童孩處心勿失君之仲季茂於文

術游藝相從操觚散帙顧余蹇劣厠迹奔逸二紀於今

情交若一屢聞凋缺互見遷黜契闊伶俜分形間質方

期末路稍追曩日時不我謀於焉斯畢營營衛尉獨守

邦秩想其永哀淮海蕭瑟嗚呼哀哉聞疾馳簡其命未

返翩其訃書來自番禺

番禺音潘禺魚容切番禺二山名在南海外今廣州與循為近故云

塊守窮荒山夔與居

山夔獸名也如龍而一足

有眉不申有志不舒

況逢零悴當此囚拘拊膺長慟長慟何如菲禮無取沉
哀有餘嗚呼哀哉

祭呂敬叔文

呂敬叔恭也公嘗為呂侍御恭墓誌卒以元和八年六月年止三十有七此公所以重惜之也其曰惟子之兄志同義比官刺一州四十而死蓋言呂衡州溫云

維年月日朔友人從內兄守永州司馬員外置同正員

柳宗元謹以酒肉之奠致祭於亡友呂敬叔之魂嗚呼

鞠躬歷聘或以不荅

謂孔子也

屠魚垂離夫何克合

謂呂尚也

大

或不容小或見遺往來逢迎今古參差惟子之中忠勇

充之以誠與物退受其疵智謀宏長辯論恢奇巖義博

大

巖一作巍

與世異資何付之器而躋於時

躋知利切

嘗曰余

武王功是期誓者其力

者渠伊切詩者定爾功

以達皇威邊鄙不

靖俾供輿師諸侯順道戎貆咸宜今其沒矣哀志之違

知之無補世又罕知嗚呼哀哉昔與子游尚疑其志及
觀其長誠任其事日異其能歲增其智進如川行浩浩
而遂天乎有亡中道是弃余慎取友惟心之虔周遊人
間餘二十年擯辱非恥升揚非賢一貫於道無四五焉
子之我知不以事遷言而見信貌阻心傳我黜終世子
天於前徒稱子志誰信我言與子俱已孰云後先惟子
之兄志同義比官刺一州四十而死子仕方初百年有
幾如何默默去我端已

端淳公切說
文往來數也

有穉之妻有弱之

子海孺東周

孺而宣切

號哭萬里墓紉之行獲出於此

紉切

與紉同說文牛系也周禮封人置其紉公時在永呂歿廣州其孤爽等以其柩如洛陽祔墓於大墓故云獲出

于此

爰陳酒肉式嘉且旨讀茲哀辭以奠而誄嗚呼敬

叔吾道已矣尚饗

祭崔君敏文

崔君敏即朝散大夫永州刺史崔公也公嘗為之誌所載甚詳元和五年九月在永州卒文益是時作

夫產崑崙者難為玉植鄧林者難為木公以令望顯於

華族藝邃六書

周官保氏掌教國子以六藝五曰六書注象形會意轉注處事假借諧聲也

學該七錄耽此黃老

耽都含切

恬於寵辱入補黑衣

謂公以千牛倫

身佐環衛也戰國策左師觸龍言於趙太后曰老臣出賤息舒祺最少不肖願令得補黑衣之數以衛王宮

參甸服

謂公為藍田尉也

紀綱淮海政令惟肅

謂公為楊州錄事參

軍也宰制岳瀕周於仁育

謂公為許州臨潁汝州龍興令也

儲闡典議直

清攸屬

謂公為太子司議郎也

久次推能二州繼牧

謂公為歸州刺史遷永州

也 至於 是邦率由舊俗和易勿亟優游自足既有少吏

勤於庶獄妖誣殄除淫祠翦覆

謂公擒戮妖帥毀君蒿淫昏者千餘室也事詳

見誌出令三歲人無怨讟進律未行歸神何速其咸以罪

戾謫茲炎方公垂惠和枯槁以光鳴鑾適野泛鷁泂湘

鷁倪歷切廣筵命樂華燭飛觴高歌屢舞終以無荒紛慮斯

屏憂懷暫忘良時不再斯樂難常今其奈何顧慕感傷

嗚呼室有迭去川無息流追懷曩辰恍若夢遊奠徹中

寢魂遷乘舟邦人永思匍匐隱憂況我懷德心焉若抽

潔誠可鑒蘋藻非羞

祭段弘古文

段弘古公嘗為之誌此本不載已別列之外集
觀其以直遊諸公間而卒不克用惜哉元和九
年卒於桂州永州刺史崔公能以公及劉禹錫
之薦知之乃致其喪來永為具費歸葬於澧公
之文當其喪之
過永而祭之也

世病乎直人悅其和行而不容雖聖奈何提其信義誰

與同波磳磳以終

磳丘耕切

堅不可磨

論語不曰堅乎磨而不磷

游得其

仁友擇其益始於可進終會於厄精誠介然將貫金石

追恩懷舊興詞憤激君昔來辱備聞嘉言宵會北堂晝

宴南軒去適於越不日其旋載除我居望爾北轅今者

之來丹旄有翩閼茲英志限此中年嗚呼哀哉君實斯
貧有子而幼孰云履信惟天所祐道途之資敢廢於舊
志君之行銘石斯授有潔其觴有楚其豆庶鑒於誠臨
茲饗侑

哭張後餘辭

作之年月未詳惟辭謂既得進士明年疽發
髀卒當在京師時作也附次貞元十八年文

後餘常山張氏孝其家忠其友為經術甚邃而文少余
七年頗弟畜之與之居終日冲然忘其有人與之言鏗

然而厲

銓丘耕切

辯而歸乎中凡人有道而不顯於世則曰

非其世也

一無則曰字

道而得乎世然而

一作猶

不顯則曰命

命之微不可知知而索乎外者曰性與貌後餘之性可

謂良矣其貌可謂肅矣博實弘裕宜為大官者老求其

所以天賤無可得焉既得進士明年疽發髀卒

疽子余切髀音

陞後餘之死人咸痛之曰天之佑善人而殺是子何也

激者曰天之殺恒在善人而佑不肖莊周之說以為人

之君子天之小人張君豈天所謂小人者耶是二者又

非論之適也吾謂善與惡天與壽貴與賤異道而出者也無取喜怒於其中道之出者多其合焉者固少是以君子之難貴且壽也後餘母老而喪良子東西行者助之哭焉況其知者耶然後餘不與諂冒者同貴不與悖亂者同壽歸潔乎身聞道而死雖勿哭焉可也嗚呼向更使既聞道而且貴且壽則其顯庸也遠矣又烏能勿痛乎遂哭之以辭嗟嗟張君善不必壽惟道之聞一日為老人皆反是百稔猶幼子之優游是亦黃耆嗟嗟張

君寵不必貴尊嚴為人早服高位淫諛肆慾銀艾淪弃
子之崇高無媿三事吾見皤皤而童皤音婆老人白也赫赫而
辱進襦袴於机杖負泥塗於冕服已雖有餘人視不足
子之跡不混乎其間者幸也宜賀而弔宜歌而哭吾其
過乎與其寵而加貴善而加壽道施於人慶及其母從
容邦家樂我朋友豈不光裕顯大歟而不克也則弔而
哭者其無過乎嗚呼

祭李中明文

公嘗荅韋中立書云來南六七年二年冬幸大雪文謂水之綿綿山萬層兮又云淫以雨雪紆委礪礪兮此必在永時作也

致祭於亡友中明之靈夫子之道邈以恒兮夫子之志勵以兢兮求中慊末若履冰兮敦仁以孝實烝烝兮唯毀死虧禮其他莫懲兮

一云誰毀無虧禮莫徵兮

秉端守一信厥明

兮月踰歲長行若登兮外溫其顏內類直繩兮謾言來加不遽陵兮舉世羣非自視弘兮庶優游於道大賚是承兮掩冤舒抑與類升兮胡茫茫其不信卒以禍仍兮

豈韜忠哀信鬼所憎兮

哀一作裏哀信一作履誼一作履信

將教言吾欺

終不可徵兮吾方期子於暮冀有興兮今而弃余志若

崩兮若將援而上喪厥肱兮怛其殞心交背膺兮水之

綿綿山萬層兮又淫以雨雪紆委礪礪兮

礪期矜切礪士冰切又音

增石鵙鵙夜啼羣暝凝兮

鵙音鵙鵙音休

魂鬼以行中道殘殍

兮殘音陵殍音競鬼出兒

魑魅撫呵曷可憑兮

魑抽知切魅音媚

聊致吾

慎斯言孰稱兮

楊氏子承之哀辭

并序

考之表系楊憑之子妣皆以之字為名曰渾之
曰後之曰敬之是也獨不詳承之所自然必憑
之妣蓋詞謂世父孔悲兮湘水滔滔世父伯父
也據水經馮水出臨賀下注湘水此必元和四
五年間憑謫

臨賀時作

楊氏子承之既冠有成人之道其明年四月不幸而夭
其外姻解人柳宗元為之慟且出涕噫是子也氣淳以
愿志專以勤確然而直方吾未知其止也作辭賦書
論其言甚偉余方愛之謂可以為器者故不知慟且出
涕況其親戚者乎凡天之生物也不類精麤紛厖

厖一作亂

賢愚混同或遠而合或親而殊然則雖人親戚亦將有
不克知其美者若楊氏子者其親戚皆賢咸得知之者
也使知之徒以增其悲愁怨號之聲無為也用是為之
辭以相其哀焉

葆醇熙兮承貞則懿文章兮好循直誠耿介兮又綽寬
學之勤兮行彌專質圭璋兮文虎豹超凌厲兮馳聖道
力未具兮志求通道之遠兮足先窮有母噉噉兮有弟
哀號噉音世父孔悲兮湘水滔滔去昭曠兮沉幽冥魂

冥冥兮竟難託死者靜兮生者愁子之淑兮徒增憂志
甚良兮命甚蹙子之生兮又何欲悲吾耳兮動吾神誰
使子兮淑且仁嗚呼已乎不可追終怨苦兮獨何為

柳河東集卷四十

欽定四庫全書薈要卷一萬三千七百七十六

集部

柳河東集卷四十一

唐 柳宗元 撰

祭文一十五首

舜廟祈晴文

按史舜葬於九疑實惟零陵零陵永州治也文謂勤事南巡祀典以躋此焉告終宜福遺黎此必在永代其州刺史作其時日則不可得而考

年月日某官某敢用牲牢之奠昭祭於虞帝之神帝入

大麓雷雨不迷帝在璿璣七政以齊九澤既陂錫禹玄

圭至德神化後誰與稽勤事南巡祀典以躋此焉告終

宜福遺黎廟貌如在精誠不昧今陽德僊候有淦淒淒

降是水潦混為塗泥岸有善崩流或斷堤泛濫疇壠坡

陀圃畦陀唐何切恒雨獲戾循咎增悽忍茲嘉生均彼蓬藜

敢望誅黑蜥音戾淮南子曰黑蜥神虬潛泉中而居天將雨則躍扶陰蜺扶音秩擊也春

秋元命包云虹蜺者陰陽之精又月令章句云陰陽不和即生此氣虹見有青赤色常依陰雲而晝見於日衝

式乾后土以廓天倪染盛不害餘糧可棲或簸或洩為

酒為醢鎗鎗笙鏞坎坎鼓輦百代祀德毗心不攜豈獨
蘋藻徵諸澗溪帝其聽之無作神羞

雷塘禱雨文

元和十年作或載之韓文公集非是蓋公嘗志其從父弟宗直之殯謂元和十年名為柳州七月南來宗直嘗從謁雨雷塘則此文為公之作蓋非文公之文明也

惟神之居為坎為雷專此二象

一作狀

宅於巖隈風馬

一作

輶雷車肅焉

一作然

徘徊能澤

一作宅

地產以祛

一作扶

人災

欽茲有靈爰以廟饗

一作享

神惟智知

一作為致誠

我敬

一作以

誠往苟失其應人將

一作神

安仰歲既旱暵

音旱又音漢乾也

害

茲生長敢用昭告期於肸臚

肸黑乙切又許訖切說文響布也臚音響

其自

朝

一作從

受命臨茲裔壤泣政方初

一作方

庶無淫枉潔庶

自持忠信是

一作猶

仗苟有獲戾神其可罔

一作調

擢擢嘉

生惟天之養宜使染盛夷於草莽騰波通氣出地奮響

欽若成

一作神

功惟神是獎

祭肅文

肅音導又音毒以旄牛尾為之在左騂馬首故文謂禮有大特化為巨梓秦人憑神乃建茸頭

正謂此也元和十四年代
裴中丞行立討黃賊時作

維年月日某官以牲牢之奠祭於纛神惟昔禮有大特

化為巨梓秦人憑神乃建茸頭是為兵主用以行師

史記

秦襄公二十七年伐南山大梓豐大特徐廣曰今武都
故道有怒特祠圖大牛上生樹本有牛從木中出後見
於豐水漢宗蚩尤亦作靈旗漢高祖立為沛公祠黃帝

之中

幟皆赤應劭曰蚩尤古天子

既類既禡指於有罪禡音

好五兵故祠祭之求福祥也

罵類

禡音

禡皆師

北面詔盟抗侯以射雖有古典今棄不用惟茲

之制神實守祀有蠹黃孽保固虐人俾茲太平猶用戎

律天子有命施威於下惟守臣某董衆撫師秉羽先刃
出用茲日敢修外事爰薦求牛庶無留行以殄有罪國
有祀典屬於神明傷夷大命無敢私顧惟克勝敵以全
天兵去茲蝨蠱上音矛下音達我涵育收厥隸圉役於
校人海隅黎獻永底於理無或頓刃以為神恥急急如
律令

禡牙文

周官典瑞掌牙璋以起軍旅以治兵守注云牙
璋瑑以為牙牙齒兵象故以牙璋發兵又兵書

曰牙旗者將軍之精凡始豎牙必以剛日剛日者謂上尅也兵牙之日吉氣來應大勝之徵與前文同時作

維年月日某官某以清酌少牢之奠禡於軍牙之神秦

定百越

秦始皇并天下分為三十六郡平百粵又置閩中南海桂林象郡四郡粵與越同

漢開

九郡

漢地理志黃帝畫野分州堯遭洪水分絕為十二州禹制九州周克商改禹徐梁二州合之於雍青

分冀州之地為幽并漢興至武帝攘却胡越開地斥境南置交趾北置朔方之州兼徐梁幽并夏周之制改雍

曰涼改梁曰益凡十三部置刺史

自茲編列同於諸華天寶兆亂北方

薦役惟是南方久稽討伐藩蠻怙險乳字生聚悖傲威

命虐夷齊人黃姓陋孽

魚列切

實恣盜暴僮壯殺老掠

使臣

寇音奪

梟視洞窟以逃大戮今皇帝受天景命敷於

有仁凡百凶毒罔不震伐齊魯

一作青

誼殄趙魏顯化溥

天之下咸順帝理唯是瑣眇尚恣昏頑致天震怒命底

於罰官臣某欽率邦典統戎於征惟爾有神懋揚迺職

敢告無縱詭類無劉我徒

劉音流釋云寇也殺也

鏃刃鋒鏑畢集

於兇躬鎧甲干盾

鎧口代切甲也

咸完於義軀焚煬蕩沃往如

行虛俾人懷於安以靖離之隅

離南方之卦也

在是舉也往欽

哉無作神羞急急如律令

祭井文

公集有井銘在元和十一年三月此文同時作

致祭於水土之神惟神蓄是玄德演為人用不窮之養

功齊乳湏

觀勇切又多貢切乳汁也

惟古有制八家所共是邦闕焉

官守斯恐蘊利滋久閔靈則深爰告有神惟測我心卜

茲利兆於彼城陰神斯有仁是鑒是臨惟昔善崩今則

堅好惟昔遞

一作

石今則順道終古所無聿從心禱非

神是與人力焉保發自玄冥成於富媪克長厥靈不愛
其實敬修報禮式薦蘋藻

禋門文

周禮鬯人之職禋門用瓢齋注云禋謂營鄴所
祭門國門也春秋傳曰日月星辰之神則雪霜
風雨之不時於是乎禋之山川之神則水旱厲
疫之不時於是乎禋之禮記曰雩禋祭水旱也
據文云禋於城門之神又云淫雨斯降害
於麴麥豈次前篇在柳州作歟禋音詠

禋於城門之神惟神配陰含德司其翕闢能收水沴以
佑成績淫雨斯降害於麴麥野夫興憂官守增惕諸陰

既閑休徵未獲敬用瓢齋

瓢婢遙切齋音齊謂取以展
甘瓠割去抵以齊為尊

周索納其雲氣復我川澤惟神是依式佇來格

叔父祭六伯母文

公之叔父有四

纁居其次焉

維貞元十七年歲次辛巳二月癸巳朔二十五日丁巳
姪男華州華陰縣主簿纁謹以清酌庶羞之奠敬祭於
六伯母之靈伏惟天錫壽考神資淑德高明而和柔惠
且直敬長慈幼宗姻仰則不偕貴位孰不悽惻嗚呼哀

哉移天夙喪丁此閔凶主器繼天莫承於宗懿彼賢女
孝誠自中溫溫良人竟揚德風承順必敬滑甘則豐致
養有榮其道克終天禍弊族遠承哀訃纏牽官仕一作事

奔哭無路亦既請告聿來京師以號以呼祇拜堂帷子
姓彫落宗門日衰託於外姻陳此靈儀幼女號戀誓言
固之仁賢見容曲遂其私內顧孱眇祇益摧悲誠愧於
人豈曰得宜今歲調選獲參士林主其簿書於華之陰
受祿雖微莫遂曩心夙駕東征祖輶將臨輶音跋朔望
道祭也

是違哀懷豈任嗚呼哀哉

祭獨孤氏丈母文

夫人獨孤申叔之母也申叔字子重少有聞稱年二十七而卒故云克生賢子未壯而死又云曩與子重道契義均也其曰自罹禍譴逾紀漂淪蓋公自永貞元年乙酉謫官至元和十一年丙申為一紀耳

維年月日某以清酌之奠祭於獨孤氏丈母之靈惟靈育德涵仁克生賢子生而不淑未壯而死名播九圍望高羣士雖微祿位人羨其美在抱無孫承家乏祀孝女

良壻適遵燕喜某曩與子重道契義均知心為貴實在
斯人奉養宜繼將致其勤竟罹禍謫逾紀漂淪風志斯
阻微衷莫申冀榮末路私願獲陳遽此承訃天乎不仁
嗚呼哀哉昔也高堂世悲其獨今茲玄室孝道當復神
感昭融不疾而速靈識逾濬承歡載穆式致其安寧
寘其毒願言有知以慰幽躅

祭從兄文

據文云銘墓有詞發我狂言以集考之公嘗為
大理評事柳君墓誌即公之從兄也諱寬字存

諒文又云假守郡藩蓋寬嘗為邕州見集之馬
退山茅亭記文又云歲首去我將濱海壖與誌
所謂挺於海壖者皆
合當即寬無疑也

嗚呼我姓嬋媯

嬋音蟬媯於
虔切長兒

由古而蕃鐘鼎世紹圭茅

並分至於有國爵列加尊聯事尚書十有八人中遭諸

武抑慙讎冤踣弊不振

踣蒲
比切

數逾百年近者紛紛稍出

能賢族屬於曜

旂音旌與旌同旌旗也曜
戈笑切與耀同照曜光也

期復於前君

修其辭楚越猶傳從事諸侯假守郡藩人謠吏畏威惠

咸宣神乎我欺命返不延興起之望是越是愆歲首去

我將濱海壖留遊歡娛涉月彌旬夜爇膏炬晝凌風煙

理策嶠嶽

嶠音區嶽音欽高險兒

縻舟潺湲

潺湲山切湲于權切流水兒

將辭

又醉既往而旋今者之來徒御淒然垂帷檐檐

蚩占切衣蔽前

也飛旒翻翻升拜無形洽

一作合

哭誰聞逝歸從祔於鄧

之原銘墓有辭發我狂言祗陳其悲匪暇於文觴有旨

酒豆有純肩伊奠之菲而誠孔繁靈耶罔耶有涕漣漣

祭弟宗直文

集有志宗直殯云元和十年七月卒文亦是時作也

維年月日八哥以清酌之奠祭於亡弟十郎之靈吾門

彫喪歲月自

一作已

久但見禍謫未聞昌延使爾有志不

得存立延陵已上四房子姓名有單緒

一作各為單子

慆慆早

天

慆七切

汝又繼終兩房祭祀今已無主吾又未有男子

爾曹則雖有如無一門嗣續不絕如綫仁義正直天竟

不知理極道乖無所告訴汝生有志氣好善嫉邪勤學

成癖攻文致病年纔三十不祿命盡

一作年過三十不掛命書

蒼天

蒼天豈有真宰如汝德業尚早合出身由吾被謗年深

使汝負才自棄志願不就罪非他人死喪之中益復為
媿汝墨法絕代知音尚稀及所著文不令沉沒吾皆收
錄以授知音文類之功更亦廣布使傳於世人以慰汝
靈知在永州私有孕婦吾專優恤以俟其期男為小宗
女亦當愛延子長大必使有歸撫育教示使如已子吾
身未死如汝存焉炎荒萬里毒瘴允塞汝已久病來此
伴吾到未數日自云小差雷塘靈泉言笑如故一寐不
覺便為古人茫茫上天豈知此痛郡城之隅佛寺之北

飾以殯紼

注見祭呂敬叔文

寄於高原死生同歸誓不相棄庶

幾有靈知我哀懇

祭姊夫崔使君簡文

公集有永州刺史流驩州崔君權厝誌即簡也誌云元和七年正月卒八月柩至永遂藁塋於社之北文是時作

永州刺史博陵崔公之靈天之生人或哲或愚君取其英爰曜於初譽動京邑施於方隅密勿書奏元侯是俞蜀寇內侮禍聯羌髳音矛君出顯畫披攘其徒南平劒門

西獲戎俘超受刑曹留總南都移刺連部下民其蘇道
不可常病惑中途悍石是餌元精以渝雷謗爰興按驗
增誣始雖進律終以論辜溟海浩浩而君是踰崇山茫
茫而君是居厥弟抗憤叫於康衢天子憫焉訊以文書
御史既斥連帥是除期復中壤遽淪別區喪還大浸又
溺二孤痛毒薦仍振古所無何謫於天降此翦屠柩不
及歸寓葬荒墟將葺將就誓還里閭嗚呼哀哉君之子
姓惟自我出母儀先虧父訓又失煢煢相視

煢與惻同憂也撫

悼增恤咸冀其才以大家室惟昔與君年殊志匹晝咨
夕計期正文律實契師友豈伊新昵誰謂斯人變易成
疾良志莫踐乖離永訣嗚呼哀哉永山之西湘水之東
殯紼以出見祭呂敬叔文斧屋爰封見祭崔少卿文神非久留息駕於
中書石為誌世德斯崇手輟以酌輟音拘挹也酌也涕出焉窮

又祭崔簡文

一本作祭神樞歸上都文據簡元和七年既藁
塋於永公謂三年將復故塋且云後三年辭當
備蓋自七年至十年為三年公元和十年正月
已召至京師而此文謂君死而還我生而留則

當是元和

九年作矣

嘻乎崔公之樞嘻乎崔公楚之南其土不可以室或坊

而頽

坊房吻切

或确而萃

确音慤多大石也萃昨沒切又昨律切

陰流泄漏瀝

沒渝溢

瀝思廉切爾雅泉一見一否為瀝

碩鼠大蟻傍穿側出虧踈脆

薄久乃自窒不如君之鄉式堅且密嘻乎崔公楚之南

其鬼不可與友躁戾佻險

佻音迢

睽睽欺苟

睽音閃暫視也睽試刃切

張目也

睽賤暗冒

睽坐果切冒音忽

輕囂妄走

囂音銀

不思已類好

是羣醜不如君之鄉式和且偶日月甚良子姓甚勤具

是舟輦寧君之神去爾夷方返爾故隣奕奕其歸宜樂
且欣君死是還我生而留遠矣殊世曷從之遊酹觴於
座與涕俱流

祭崔氏外甥文

即簡之子曰處道曰守訥以奉簡之喪踰海不幸暴風溺死此必喪至永後次前祭崔使君文作一本云崔君筵側祭二甥文篇首有年月日八舅十舅以酒肉之奠敬祭外甥韋六小卿之

魂字

嗚呼生有孝姿淑且茂兮謂吉其終道克就兮胡典而

喪離厥咎兮蹈道而違死誰祐兮豈汝之昧不能究兮

將奪之鑒使昏霧兮

霧與霧同

反復攪予哀何救兮骨肉無

從魂焉覲兮庶幾來歸餒以侑兮

餒音俊熟食也

酒實於觴肉

盈豆兮豈伊異人余所授兮來耶否耶歆氣臭兮

祭崔氏外甥女文

崔氏即簡之女諱瑗嫁郎州員外司戶河東薛

巽元和十二年六月卒公時在柳也誌曰某月

日遷柩於洛某月日祔於墓在北

邙山南洛水東故曰邙阜有位云

叔舅宗元祭於二十六娘子之靈凡我諸甥惟爾為首

甥於我氏恩顧彌厚惠明貞淑仁愛孝友女德之全素

風斯守播於族屬芬

一作
蔡

馨自久恭惟伯姊道茂行高

上承下訓克敬能勞夙有儀則刑於汝曹雖云性善抑
自良陶冶之先君以文誨我周流辯論有疑必果恒革
其非以成其可孰云具美易以生禍汝及諸弟流離莫
從幸獲我依以慰困窮歸之令族有蔚其容方冀榮壽
遽羅災凶嗚呼哀哉汝自艱酷二弟繼終海門之哀今
古罕同駢也英文敷暢洽通實期振耀弘我儒風又茲

天闕神理何蒙盛德餘慶宜福其豐胡然降戾惟禍之
逢嗚呼哀哉前歲詔追廷授遠牧武陵便道往來信宿
幸茲再見緩我心曲猶且輕別瞻程務速孰知自此遂
間幽躅除玉切臨視無路遡風慟哭怛然自中如刃之觸
却阜有位青鳥載卜相冢書曰青鳥子稱山三重
相連名連傘山墓之二千石道途
尚艱歲月逾感方俟歸紉再期奠沃寄哀斯文心焉往
復嗚呼哀哉

祭外甥崔駢文

駢當是處道守訥之昆弟也文謂
我自得罪無望還都此在永時作

祭于卿郎之魂嗚呼天恡靈奇

恡音吝

取不可貪既睿又

力神誰以堪汝不是思而縱其志盜其管籥塞其篋匱

抽深挾密檐重揭貴

檐蚩占切衣蔽前也重傳容切揭丘傑切舉也又巨列切負也

守

吏失職訢帝行事果殄爾躬以寧其位豈不信耶不然

無鬼誅之行而中道夭死有拔類之才而三見廢委仁

充其軀毒中骨髓其何以為累也兄弟逾十我出惟八

既孤數祀中分存沒我為汝舅汝為我甥求仁具得為

藝繼成天下莫倫古罕並行人而思之幾不欲生嗚呼

既致其愛祇極其哀秦越萬里心魂徘徊念與汝別桓

公之臺顧余猶壯視爾如孩戲抽佛筴

與策同

前次淹隈

淹徒何切隈鳥回切水曲也

笑領即路鳴鞘不迴

鞘音蕭又音笑鞭也

豈云古

今自此而垂孰為鬼神忍是陰誅得疾之日兄弟莫在

謁醫問巫卒以幽昧葬之東野誰賁誰會既虞以奠誰

主誰酌

虞虞祭也禮記曰豈若速反而虞乎疏曰葬既已竟神靈須安豈若速反虞祭安神乎

孤

魂冥冥何託何逝嗚呼哀哉刑曹繼之以病告余銜憂

驅使裹藥操書雖驚狀劇猶恃神扶豈知所賴終以誤
吾我自得罪無望還都想爾新墓少陵之隅何時歸祔
圯土下呼圯彼美切毀也漬淚徹壙漬疾智切漚也以沾以塗此心未
慊祇益摧紆累見於夢寧知有無寄之哀辭惟俎及壺
嗚呼哀哉

柳河東集卷四十一

謹案卷四十第八頁後七行說禮樂而敦詩書刊
本說訛閱據左傳改

第十一頁後四行刃上而長刊本刃訛月據禮記
檀弓注改


第十八頁前二行學該七錄刊本七訛十案梁書
阮孝緒撰七錄今據改

卷四十一第二頁後二行期於肝蠶刊本肝訛彤
案司馬相如上林賦肝蠶布寫今據改正

第三頁前四行有怒特祠刊本特訛時據史記秦
本紀徐廣注改

第四頁前一行必以剛日刊本剛訛綱據曲禮外
事以剛日句改

第十頁後三行崇山茫茫刊本崇訛嵩案此指驩
州界之崇山非嵩高山也今據郭雲鵬本改正



總校官候補中書臣吳紹潔

校對官編修臣裴謙

謄錄監生臣范桐